



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Bihar electoral voters list nung
kü tenüng mali: Tejashwi Yadav

Küm 10 sülen -i
Tottenham toktsütsü



VOL. XXII ISSUE NO. 289 (ADOK 289)

DIMAPUR

AMUNGÜ (SUNDAY)

LUROI (LUROI) 03, 2025

₹ 5.00

TR.Zeliang-i ajak asoshi Nagaland yangertsü ayongzüük

Dimapur, Luroi/August 02 (TYO): Planning & Transformation Department ajanga State-level Sampoonnata Abhiyan Samman Samaroh for Aspirational Districts & Blocks sentong ka August 2, 2025 nü Capital Convention Centre, Kohima nung ayongzüka liasü.

Sentong nung tongti tesemdanger ama jembidang, sorkari yimsüsüba nung nisung ajak dak kongshitsüla aser terenlok mapatem yimtsüng ajunga atongtsüla, ta Deputy Chief Minister in charge of Planning & Transformation and National Highway, T. R. Zeliang-i ashi.

Iba tanüla nung Samapornatha Abhiyan ya tatishitsü tongtipang lir, koba ajanga nüburtem mezüng südaktsütsü aser tajemzüka jenjang nung aliba nüburtem kishizüng tonga sorkar arudaktsütsüa inyaktüsü akhanger, ta Zeliang-i ashi.

Pai Samapornatha Abhiyan programme indang mangdang lemsatepdang, yimtsüng ka süang, kibong ka süang mesüra nisung ka süang, ibai ajak abensa aser ajak awajemba temaitsü lir ta ashi.

Nüburtem kibur akum dang temelenshi arur ta pai ashi aser field workers aser district administrators temi lungjemer staff aser nübur teyari nung inuakba ajanga iba Abhiyan terenlok alir, ta ashi.

Aspirational Districts and

Blocks Programme yagi sorkar inyakyim nung ranglokba kisüing masü saka nüburtem nem tashi agütsür aser nüburtemi shilem agiba ajanga terenlok kera aoba dang masü teti asoshi alir, ta Zeliang-i ashi.

Deputy Chief Minister-i District Administration Health, Education, Rural Development, Social Welfare, aser Agriculture & Allied densema departments ajunga dang teka amteper inyakba yimya sübatsü ajungshia liasü.

Sentong tenzüka Development Commissioner, Temsunaro Aier, IAS ajanga jembidang, aspirational districts programme ya Ato Kilonseri 2011 küm January ita linük nung tajemzüka tia nung aliba region nung terenlok maparen tekeraba nung ajak asoshi inyaktüsü nükjidong nung tenzüktüsü ta ashi.

Linük nung dangar memenep aliab district tem tajungba kuma melenshidaktsütsü nükjidong nung iba sentong ya tenzü, ta lai ashi.

Iba sentong ya ajanga health, nutrition, education, agriculture aser infrastructure tsütsü tanemtanemi terenlok lir, ta ashi.

Nagaland nung Aspirational Blocks Programme kübok aliba aspirational blocks asemji Kiphire district nung Kiusan Block, Zunheboto district nung Akuhaito Block aser Noklak district nung Thonoknyu Block alitsü, ta lai ashi.

Naga yimden tebilemtsü bentettsü temulung agüja inyaktar: Kaito



Longsa yim dak Tsüngremmung benjong amung dang tsüngsangba noksa angur.

Longsa yim, 2nd Aug (TYO): August ka nungi tenzüka Longsa yim dak Tsüngremmung benjong mungdar aser Aug 2 Yatinü Longsa Salang Lenten nung tongti tesemdanger G. Kaito Aye, Minister for PWD (R&B), Nagaland; tetushi tesemdanger Imkong L. Imchen, MLA and Advisor for Information & Public Relations & Soil & Water Conservation; aser tetushi tejaoker Imkongmar, MLA and Advisor for Minority Affairs & Sericulture, Nagaland par asem aküm nung kishikina Moya, Sangtam yim nungi yar tsüngsangertem jaoka kanga longsotepa mungogo. Iba benjong ya Department of Tourism, GoN-i yaria Longsa yimdeni ayongzüka akar. Iba benjong August 3 nü aien lenpi maparen inyaka tembangtsü sentong renema lir.

Tanü tongti tesemdanger Minister, G. Kaito Aye-i jembidang, Tsüngremmung metsünga reta amungba yim kadi arua benjong külemi amungtsüsa maongka tulu anguba asoshi pelaba den Aor dang masü saka

tanga kintem jaoka iba ama telungjem nung amungba ya jangratemtsüka lir, ta tenügsang agütsü. Kishikina yim aika iba ama benjong külemi mungnüaka memungteter, saka Longsa-i iba ama kin balala sabang ka nung anir arua külemi amungtsüsa atongtetba ya takok tulu lir, ta pai pelaba metetdaktsü.

Tsüngremmung amungba nükjidong ya yim ka telungjem asoshi dang masü saka lokti tuluba lungjemetba ya asütsü. Iba ama benjong ajanga nüburtem külemi lungjemer sobaliba senmang wazüka ayur, ta pai ashi.

"Naga nunger solution asoshi temulung agüja inyakdaki", ta paisa sarkar tenüng nung Naga nunger tebilemtsü dak sentakba olen ka metetdaktsü. Naga yimden tebilemtsü atema ya "telungjem aser aroki shilem agitsü nüngdaker, aji asünung dang teti atema telemtetba arutettsü", ta pai shisem. Aiben Naga nunger ya tongtibang tebilemtsü ajurudang asenok melungjemeteter, anungji, telungjem ya sobaliba melentepba

ajanga bener arutsütet, ta paisa nenshi. "Asenok ya ainer ka masü, asenok ka dang", ta paisa lungjema lidaktsüba o ka lemsatep.

Longsa yimdeni kanga dang nüngdakba koba Longsa-Surohuto-Aghunato lenmang blacktopping yoktsü aser Dikhu apu RCC yanglutsü asoshi tezüluba ka agütsüogo, ibaji nangzükaibo mayur, saka Dikhu (Tzüla) ayong nungi Longsa yim tashi lenmangjibo pai sarkar den tongtepa inyaktüsü merangtsü, aji masü dang lenmang anepaluba mapajibo pai reprangtsütsü, ta metetdaktsüogo.

Longsa-Surohuto-Aghunato lenmang atema ya state sarkari North Eastern Council kübok proposal bo yokogo, iba mapatong ya kanga tulu saka ano teimla mesamai lir, ta pai ashi. Iba mapatong ya taoba Nagaland Chief Secretary, Alemtemshi Jamir (retd IAS)-i shisatetba mapa ka lir. Aji süaka, ibai mapatong kanga tulu asünung, state sarkar kisüngibo meinyaktettsü, ta paisa metetdaktsü.

(Maneni tapak 2 nung...)

ECI-i BLOs & BLO Supervisors nem teyari tali agütsütsü

Sr No	Designation	Existing since 2015	Revised now
1	Booth Level officer (BLO)	Rs. 6000	Rs 12000
2	Incentive to BLO for Revision of electoral roll	Rs 1000	Rs 2000
3	BLO Supervisor	Rs 12000	Rs 18000
4	AERO	Nil	Rs 25000
5	ERO	Nil	Rs 30000

(TYO): Tasüngtet electoral rolls ya democracy tamendak dak lir. Electoral roll machinery nungya Electoral Registration Officers (EROs), Assistant Electoral Registration Officers (AEROs), BLO Supervisors aser Booth Level Officers (BLOs) dena lir, aser electoral rolls indang-indanga aser ochishia renemba nung parnokki mapa meranga inyaker aser tongti shilem agir, ta Election Commission of India sangdong ka ajanga ashi.

Anungji Commission-i BLOs indang annual remuneration anasü agi timba kumtsütsü aser electoral rolls renemba aser revision agiba nung shilem agiba BLO Supervisors indang remuneration timba kumtsütsü

Iba ama tesüsa revision agiba ya 2015 nung liasü. Iba den ano EROs aser AEROs nema tang nungi tenzüka honorarium agütsütsü.

Item dak alia Commission-i Bihar nungi tenzüka Special Intensive Revision (SIR) asoshi BLOs atema specoal incentive sen 6,000 agütsütsü agizükogo, ta sangdong ajanga ashi.

Iba telemtetba ya ajanga Election Commission-i electoral rolls shidak ayutsü, voters yaritsü aser electoral process tashi itshitsü asoshi anibelem mesasai inyakba election personnel nem teyari peira agütsütsü asoshi inyakba sayur, ta ECI sangdong ajangasa ashi.

sangdong ka ajanga ashi. Portal tajungba kuma yanglushitsü aser nüngdakba melenshitsü asoshi khen atema iba mera ya agir, ta sangdong ajanga ashi.

ILP offline nunga agütsütsü

Dimapur, Luroi/August 02 (TYO): Inner Line Permit (ILP) agütsüba maparen online ajanga inyakba den külemi mapang tatsüka asoshi offline nunga maneni agütsütsü, ta Home Department

Terenlok asoshi shisaliok ya tiyong lir: CM Dr. Rio

Dimapur, Luroi/August 02 (TYO): Nagaland nung education sector tali tashi itshitsü asoshi mera tejangia agia Chief Minister, Dr. Neiphiu Rio-i August 2, 2025 nü virtual yimya nung Samagra Shiksha kübok senotsü teyari agi yangluba school ki o jen 51 semzüka liasü.

Chief Minister's Residential Complex, Kohima nung iba sentong agidang, ibai kakat reju tashi itshiba maparen tang teinyakdak aliba nung tongtipang mera ka lir, ta Dr. Rio-i ashi aser Government of India-i maneni yariba atema pelaba lemsatepa liasü.

Iba dak sendakba nung State Mission Director, L Jamithung Lotha-i anir Samagra Shiksha team ajanga meranga inyakba atema pai tenügsang agüja liasü.

State nung ki o jen aika khen atema dang lir aser tekeraba nung

teti asoshi kanga junga yanglutsü nüngdaker ta pai ashi.

Metokmeperi jenti liaka Department of School Education maneni tajungba asoshi pelaba lemsatep aser department dang kanga junga asadanga parnok nüngdakbatem sorkar dangi bener aritsü ashi.

State lisa majung liaka ki o jen tajungba akumba tsütsü state tanen makai renloka aor, ta Dr. Rio-i ashi.

Ajisüaka ki o jen ajungba kisüng teperi masü, saka nüburtemi yakbangi arua sorkari agütsüba ki o jen kibur kuma tajungba nung anepalua amshitsüla, ta pai ashi.

Shisaliok tajung agütsütsü kanga tongtipang lir, kechiaser terenlok asoshi shisaliok ya tiyongtsü lir, koba ajanga nüburtem nem tashi agütsür, rongsenketzüng renlokdaktsür,

maongka balala lapoktsür aser lokti indaktsür, ta Dr. Rio-i ashi.

Kasa sentong nung jembidang, sorkar indang kakat rejutem indang takdang 16,089 nungi takdang 13,767 mesüra shilem 86 shi 'instructional purposes' atema amshir, ta Advisor, School Education & SCERT, Dr. Kekhrielhoulie Yhome-i metetdaktsü aser tanünga takdang ya laboratories, libraries aser tesayurtem indang takdang ama amshir ta ashi.

Item takdang ya category pezü lemsar lir - junga aliba takdang, shilem tulu yanglushitsü nüngdakba takdang, tera yanglushitsü nüngdakba takdang aser tamshi majung takdang.

Kakat reju tem ya pucca structures, partially-pucca structures aser kutcha structur ta lemsar lir, ta pai ashi.

(Maneni tapak 2 nung...)

Advisor Imkong-i Khensayimtsüng nung Tsüngremmong benjung moatsü



Khensa yimtsüng nung Tsungremmung benjung amungba mapang Imkong L. Imchen, aser tangartem tangokba noksa nung angur.

Dimapur, Luroi/August 2 (TYO): Tsungremmung benjung ya Aor temi alu maru tsüngda amungba benjung ka lir. Benjung ajanga alu inyakba mongpu tembangba aser alu arutsü tenzükba sayur. Iba bejung ya tenüngsang agütsüba, lokti longjemshiba aser Tsüngrem nem aküm tetushi agütsüba bejung ka lir.

August 2 nü Khensa yimtsüng nung Tsungremmung benjung ayongzüka amungba mapang alakteta jaoker ama o jembidang Advisor, for Information & Public Relations

and Soil & Water Conservation, Govt. of Nagaland, Imkong L. Imchen-i, Naga nunger rongnung Aor ya Tsüngremi shimba kin ka ta pai amanger ta ashi. Paisa, ajak dak alaka Tsüngremi Ao kin ya pa sülen anidaker asütsü maongka agütsü, ta ashi. Imchen-i, benjung balala amungba ajanga kin ajaki kasüka nungibo parnok sobaliba wazüka ayutsü atema maongka angur ta ashi, ajisiüaka ajaki asen tamangba mamatoktsüla aser Tsüngremi lidaktsünüba ama alitsü merangtsüla, ta paisa shisem.

Maneni sentong tajung ayongzüka atema Advisor-i Khensa Students' Union nem tenüngsang agütsü aser ashiba agi, 28 Koridang Constituency nung yimtsüng ajak rongnung kaket shisatsü bushiba nung temaba jenjang nung aliba yimtsüng ama par yimtsüng ya constituency nung aliba nübürtem atema lenla ajak nung len sayur asütsüla.

Kasa anogo Imkong L. Imchen ya tetushi tejaoker ama Longsa yimtsüng nunga Tsungremmung benjung nung dena liasü.

Peren district nung gari tulu senzüsenpong atema tetuyuba agütsü

Dimapur, Luroi/August 2 (TYO): Peren jila nung lenmang temesü nung gari tulu senzüba ajanga gari kanga nongtepba azüoktsü aser gari tem kecha tetsükdaktsü makai senzüdaktsütsü atema Extra Assistant Commissioner Pauding Disuang-i gari

senzüsenpong atema tetuyuba kar agütsüogo.

Tetuyuba nung Jalukie nungi Peren-i aruba gari tulutem ajak Peletkie Junction nung anentsü aser nikongtsütsü 5:00 ako sülenang yoktsü, ta shia lir. Ano Manipur nungi Peren-i aruba gari tulutem ajak Peren Maram

check gate anasa anendaktsütsü aser nikongtsütsü 6 ako sülenang yoktsü, ta shia lir.

Extra Assistant Commissioner Pauding-isa, gari tulu kari danga tetuyuba agütsüba sülen manidakra temzüng ozüng kübok tapet temerenshi agütsütsü ta metetdaktsüogo.

Naga yimden tebilemtsü bentettsü temulung...

(TAPAK 1 NUNGI...)

Tang aliba Dikhu apu (Bailey bridge) ya 1960s mapang yangluba lir. Joko iba ya kanga mejungi raksar teyanglushi majung lendong nung lir. Iba apu ya Tuensang district aser Zunheboto district kübok Surohuto-Aghunato range-tem asoshi tongtibang ka, aji saka, ibai mashi mapang ka nung laotsü ana nung lir. iba lenmang ya Longsa ajanga senzür, ibai küm talangka yimeri dang concerned department den angatettepa anepalua arur. Aji

oda, iba lenmang ya blacktopping yanglu temsüogo, anungji, tanpa financial year nung ya iba mapa inyaktsü Longsa yimdenisa asüngdanga züluogo.

Sentong nung tetushi tesemdanger Imkong L. Imchen aser tetushi tejaoker Imkongmar na den Ao Senden tir, Marsanen Imsong aser taoba Chief Secretary Alemtemshi Jamir (IAS Retd) parnokia shilem agia jemb. Rongsenmongba Tatar, Longsa Tourism Committee convenor-i tarurtem pela-a

agizükba den Noklenrenba Tatar-i Tsüngremmung ratet tatongi rateta ashi. Sentong nung Sangpu Mepu, Longsati Mepu, Imnasanger, Longsa Watsü Telen, Mokokchung Town Longsa Senso Telungjem, Tichipami aser Chari yim nungi yar tsüngsangertemi shilem agiba ajanga tesentepertem kanga longsodaktsü. Limaakum Tatar-i benjong nung adener aser takok ngudaktsüba mapa nung shilem agir ajak dang pelaba shia melepzüng o metetdaktsü.

Terenlok asoshi shisaliok ya...

(TAPAK 2 NUNGI...)

Samagra Shiksha nungi senotsü teyari agütsüba ajanga school ki nung nüngdakbatem peria agütsüba nung kanga yariser, ta Advisor-i ashi.

Viksit Bharat nükjidong ataloktsü asoshi Department nung ketdangsür temi meranga inyaktar aser 2030 tashinung kaketshir lakh ka shi parnok school system-i bener arutsü department nükjidong lir, ta Dr. Yhome-i ashi.

Ki o jen tajungba akumba ajanga Government school tem nung kaketshir enrolment timba akumtsü imlar, ta Advisor-isa lemsatep.

Sentong nung State Mission Director, L. Jamithung Lotha, NCS ajanga Samagra Shiksha

indang tongmelang agi rateta ashi, koba school education nung pre-primary nungi secondary level (LKG nungi Class XII) tashi asoshi scheme tongti ka lir.

National Education Policy 2020 den lirumedema iba scheme kübok tesüiba mapang aliba Sarva Shiksha Abhiyan (SSA), Rashtriya Madhyamik Shiksha Abhiyan (RMSA), aser Teacher Education (TE) tem aitdaktsür.

Iba scheme yagi school ki o jen tajungba kuma yanglutsür, textbooks aser uniforms angati agütsür, tesayurtem training aser smart classrooms agütsür ta pai metetdaktsü.

Commissioner & Secretary, School Education & SCERT,

Kevileno Angami-i sentong nung melepzüng o jembidang Chief Minister-i lenmang sayuba aser maneni yaritepba asoshi pelaba lemsatepa liasü.

Item projects tem takok ngua mapa kuma inyaktetba nung shilem agir ajanga dang pelaba lai lemsatepa liasü.

Virtual yimya nung kaket reju ki o jen 51 semzüksüba nungya school ki tasen 15, school 17 nung classrooms tali, tesayur alitsü quarters 18 aser residential hostel ka alitsü.

Iba sentong nung MLA, A. Pongshi Phom; Commissioner & Secretary to Chief Minister, Mohammad Ali Shihab, IAS aser sendaktepa aliba department nungi ketdangsürtem dena liasü.

Mopungchuket yimtsüng nung Awareness sentong agi

Dimapur, Luroi/August 2 (TYO): Mopungchuket yimtsüng nung August 2 nü "Socio-Economic and Environmental Impact of Jal Jeevan Mission (JJM) and Its Sustainability: An Empirical Study in Nagaland" omen nung ajemdaker anogo ka atema Awareness-cum-Focus Group Discussion (FGDs) sentong ka agiogo.

Iba sentong ya Ministry of Education, New Delhi, Government of India-i nungeta ICSSR-i senotsü teyari agütsüba research project ka kübok Department of Environmental Science, Nagaland University, Lumami-i ayongzüka agia liasü.

Sentong ya Project Director aser Department of Environmental Science, Nagaland University, tekolakba Prof. Ashutosh Tripathi lenisüba nung Co-Project Director, Assistant Professor, Department of Environmental Science, NU Lumami, Dr. Ashutosh; HoD, Department of Chemistry, NU Lumami, Prof. Ambrish Singh; HoD, Department of Environmental Science, Fazl Ali College, Mokokchung, Asst. Prof. Nohochem Sangtam; aser iba project core team züngsemtem-i achayanga agia liasü.

Training ya Research Assistant, Imlirenla lenisüba nung 10:30 ako nung tenzük aser WATSAN (Water and

Sanitation Committee), Mopungchuket village, Arentensu-i lokti pela agizükba o jembia liasü, shibai yimtsüng nung tzü tanen makai agütsütsü atema taoba mapang yimdaklirtemi jenjang agiba indang metetdaktsü.

Sentong nung Prof. Ashutosh Tripathi-i Jal Jeevan Mission ajanga temelenshi bener arutsütsü atema lenmang sadema lapoka aliba, aser loktiliba aser rongsenketzüng nung terenlok bener arutsüba aser tzü mopung wazüka ayutsü atema teyari agütsüba indang lemsatep.

Mopungchuket yimtsüng nung tang JJM jenjang indang WATSAN Secretary-i metetdaktsü, shibai tang tashi nung inyaker aliba mapatem aser kibong ajak nem tap connection agütsütsü atema tetsükdaktsü alibattem indang lemsatepa liasü.

Sentong nungsa Dr. Ashutosh Tripathi-i, tzü anepaluba nung lokti shilem indang jemb. aser Nohochem Sangtam-i bushisüngdangba nükjdong indang lemsatep aser taruba field inyakyim nung teka amteper inyaktsü ayongzüka liasü.

Sentong nung Deputy Director Sports, Nagaland University, Dr. Harish Kumar Tiwari, WATSAN Committee Council den mendenbuba aser tanga lenirtemi shilem agia liasü.

Dilong Youth Association Küm 25 Wasümunng mongogo.

Mokokchung, Luroi/August 02(TYO): Mokokchung nung tanu Dilong Youth Association (DYA) tenteter kümzüng 25 abensaba nüngtem nung wasümunng sentong "Tayimjem Libaliyim" omen nung ajemdaker mungogo.

Tanu iba sentong nung Dr. Sashila Aier-i omen nung nung ajemdaker tongti o jembidang nisung ka taküm jenjang junga tayimjem süteta libaliyimtetsü asoshi pei sobaliba angateta alitsü kanga dang nungtaker, akhi mapangbo kidanger o kidanger tsüngda kishi lapoka ayu aser lemsatepa ali saka tanü putu nunga ibaji sama odagi, anungji iba jagi akhi putu ama mesüi tanü putu temeim tera mokonga akümer ta ashi.

Tongti o jembir-isa Aor senso shiai pei tetsü oshi keta sena jembitsüla, iba den külemi sobaliba benjongmung nung temelung agüja adentsüla. Pei tetsü oshi jembiba aser sobaliba metetbaji ajanga nübür tsüngda telongjem kadaktsürta lemsatep. Lanu asensortemi tanü putu den liro medema litettsü asoshi shisaliok bubshiba nung temelung agütsütsüla aser taküm libaliro nung asüngteta timi alitsüla ta lemsatep

Wt. Imnainla T. Imchen ketdangsüba nung sentong len ania MTBA Youth Mentor Kr. Tiaienla-i Tsüngrem lenisüba jazüka sarasadem sentong



Dr. Sashila Aier

tenzükba den DYA Tir Sb. Lanuakum Imsong ajanga tarur pela agizüka jemb. aser iba den taoba mapang koda DYA kechi nükjdong nung tenteta ao iba Rajem o mezüngbuba DYA Tir Wb. Tsüngtaluba Imchen ajanga rajema ashi. Mokokchung Municipal Council Chairperson Wb. Imkongchuba A ajanga tajungshi o jemb. Sentimeren Jamir Pastor MTBA-i sarasadem, Dilong Yimden ajanga tepela o jemb. aser Dilong Watsü Telen aser Mokokchung Town Lanur Telongjem ajanga salem o lemsatep, jubilee choir aser ano Sb. Lipokmeren ajanga ken tajung tena telok ajungmeso aser Jubilee Planning Committee Convenor Wb. N. Bendang Jamir ajanga melepzüng o jembiba den MTBA Evangelistic Committee Wt. L. Sentila ajanga sarasadema sentong shibanga liasü.

Chhattisgarh Court-i Kerala tsür nun ana bail nung chiokogo



August 02, 2025 nü Chhattisgarh nung Kerala tsür nun ana Durg Central Jail nungi chiokba sülen tangokba noksa nung angur.

New Delhi, Luroi/August 02 (Agencies): Honibarnü Chhattisgarh kübok Bilaspur district nung aliba special court kati Kerala tsür nun ana den tebur ka bail nung chiokogo.

Nisung shibelenba aser tamangba yimsü meyipdaksüba ken o nung tai tonglokja anogo ishika tejaklen par asem pua liasü.

Court-i par asem dang nenok indang passports ketdangsertem nem agüjang aser iba linük toktsür maotsüla, ta shia pa asem nem bail agütsü.

Hokolbarnü Principal District and Sessions Judge (NIA court), Sirajuddin Qureshi-i ken o angadanga sülen anogo ka lir tanü obendang agütsür, ta nun ana atemaji ken

o jembitsür lawyer Amrito Das-i metetdaksü.

Iba ken o bushisüngdangba nung parnoki amaliteptsüla ta court-i tuyuogo.

Bajrang Dal nung inyaker kati ken o agütsüba nung ajemdaker July 25 nü Catholic nun ana- Preethi Merry aser Vandana Francis na den Sukaman Mandavi nung Government Railway Police (GRP)-i Durg railway station nung pua liasü.

Bajrang Dal nung inyaksang jagi, nun ana jagi tashiyim amshia Narayanpur nungi tetsür asem Khristan yimsü dangi meyipdaksü aser parnok shibelenba liasü, ta ken o benoka liasü.

Kerala tsür nun ana Chhattisgarh nung apuba

tatalokba nungi ajemdaker Congress aser CPI(M)-i police aser Chhattisgarh sorkar aitsür.

Nun ana nem bail agütsüba dak sendakba nung Chhattisgarh Chief Minister Vishnu Deo Sai-i, "Ibaji legal inyakyim ka liasü aser parnok nem bail agütsüogo," ta ashi.

Ano külen tanga osang ka nung, iba ken o nungsa tetsür aseme Narayanpur district headquarters nung police station-i oa Bajrang Dal nung inyaktertem anema ken o benokogo.

Tetsür asem jagi, "Bajrang Dal züngsem jagi onok amokmeren aser nun tem anema Government Railway Police (GRP) nem kuli tiyazü agüjang ta onok rongshia liasü," ta metetdaksü.

India ya rongsenketzüng tulutiba linük tasembuba akümtsü: PM Modi

New Delhi, August 02 (Agencies): Honibarnü Ato kilonser Narendra Modi-i, India ya alima nung rongsenketzüng tulutiba linüktem rongnung tasembuba akümtsü, ta ashi.

India aser Russia na tesendaktep junga aliba aija US Tir, Donald Trump-i, linük ana jagi pei rongsenketzüng jenjang külemi südaktsütsü akok, ta jembiogo.

Modi-isa sensotem dang pei linük nung yangluba osettem alitsü ajungshi.

Honibarnü Uttar Pradesh kübok pa indang constituency

Varanasi yimti nung lokti den jembidang Modi-i, "Tang alima rongsenketzüng jenjang mejungi aliba den tarutsü rongsenketzüng tia mejangjai lir. Iba ama mapang ka nung linüktemi pei jenjang ajungtsü atema inyakteper. India-a alima nung rongsenketzüng tulutiba linüktem rongnung jenjang tasembuba akümtsü lenmang nung jajadar aser asenoki asen linük rongsenketzüng atema tongti süa inyaksüla," ta metetdaksü.

India-i Russia den tesendaktep junga ayuba

anema Trump administration-i India nung saru shilem 25 agitsü metetdaksüogo.

Brihostibarnü US-i India densema linük 70 dang exports nung saru shilem 10 nungi tenzüka shilem 41 tashi agitsü metetdaksü.

India aser Russia na tsüngda tesendaktep junga aliba aija Trump-i social media ajanga, "India-i Russia den kechi inyakerar ni mesükshir. Parnoki pei linük rongsenketzüng külemi südaktsütsü akok," ta metetdaksü.

Trump sorkar kübok anogo shia India nunger 8 shi meindoker

Bengaluru, August 02 (Agencies): Taküm January ita nung Donald Trump-i US Tir tenangzüka agiba sülen US nungi India nunger meindokba kanga bulua kümogo; taoba Tir Joe Biden mapang nung anogo shia India nunger 3 shi US nungi meindok, ajisüaka tang Trump yimsüsüba kübok anogo shia India nunger 8 shi meindoker.

Ministry of external affairs (MEA) data ajanga ashiba agi, 2020 küm January ita nungi taküm July ita tashi nung kuli balala nung ajemdaker India nunger 7,244 US nungi meindokogo, aser iba nungi Trump yimsüsüba tenzüker India nunger 1,703 meindokba densema lir.

Taküm küm tenzüker tang tashi nung US nungi India nunger 1,703 meindokogo aser iba nungjagi India nunger 864 bo ketdangertemi anepalutsüba tayimtsü aser sepaitem tayimtsü nungi anir arutsüba densema lir.

US Customs aser Border Protection (military tayimtsütem) ajanga February 5, 15 aser 16 anogotem nung India nunger 33 meindok aser US Immigration and Customs

Enforcement (ICE)-i Enforcement and Removal Operations ajanga March 19, June 8 aser June 25 anogotem nung India nunger 231 tayimtsü ajanga meindok.

Department of Homeland Security (DHS)-ia July 5 aser July 18 anogotem nung India nung 300 tayimtsü ajanga meindok.

Ano nisung 747 bo US nungi commercial tayimtsü ajanga meindok aser India nunger 72 Panama nungi commercial tayimtsü ajanga aru.

Taküm US nungi meindokba India nunger 1,703 nungjagi nisung teimbaka north tsütsülen aliba state tem nungi lir. US nungi meindokertemji teimbaka Punjab state nungi liasü (620); iba sülen tanabuba jenjang nung Haryana (604), iba sülen Gujarat (245), Uttar Pradesh (38) aser Goa (26) state tem lir.

US nungi meindokba India nungertem rongnung Maharashtra nungi nisung 20, Delhi nungia 20, Telangana nungi 19, Tamil Nadu 17, Andhra Pradesh nungi 12, Uttarakhand nungia 12 aser Karnataka nungi nisung pongu liasü.

Bihar electoral voters list nung kü tenüng mali: Tejashwi Yadav



August 02, 2025 nü Patna nung RJD lenir, Tejashwi Yadav-i osangbenertem den jembidang tangokba noksa nung angur.

Patna/New Delhi, August 02 (Agencies): Honibarnü RJD lenir aser taoba mapang Bihar Deputy Chief Minister, Tejashwi Yadav-i, Hokolbarnü Bihar nung sangdongba revised draft voters' list nung pa tenüng mali, ta metetdaksü.

Opposition party temi Bihar nung Special Intensive Revision (SIR) agiba anema nokdakba mapang ka nung Yadav-i iba osang metetdaksü.

Ajisüaka Election Commission-ibo electoral rolls nung Yadav tenüng aluba osang metetdakja pai jembibaji tiyazü, ta shiogo.

Patna nung osangbenertem senden ka nung Yadav-i pa indang Election Photo Identity Card (EPIC) number sayu aser election commission indang official mobile application lapoka "no records found" ta aliba sayu.

"Voter list nung kü tenüng mali. Süra ni election nung koma tokteptsü?," ta taoba mapang Deputy Chief Minister-i asüngdang.

Yadav-i osangbenertem senden ayongzüka akaba sülen Election Commission-i electoral rolls copy ka lemsatepa Yadav indang osang lemsatep. Iba nungji pa tenüngji Patna nung aliba Veterinary College booth nung lir.

EC-i, "Tejashwi Yadav-i pa tenüng draft electoral roll nung mali ta shiogo. Pa tenüngji Draft Electoral Roll nung Serial Number 416 nung lir, anungji pai pa tenüng draft electoral roll nung mali ta jembibaji tiyazü aser tai," ta metetdaksü.

"SIR inyakyim kübok tashishiba kar danga lira itemji benoktsü atema August nungi September 1 tashi mapang agüja lir," ta EC-isa metetdaksü.

Taküm November ita nung Bihar nung assembly election agitsü lia EC-i Special Intensive Revision (SIR) benokba anema opposition densema aikati Supreme Court nung ken o benoka lir. Parliament House anaprongla nunga opposition-i SIR anema longkak aiter.



August 02, 2025 nü Seville, Spain nung India ambassador to Spain, Dinesh K. Patnaik den Indian Air Force (IAF) nungi tongti ketdangsertemi Airbus C-295 military transport aircraft agizükba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 03, 2025

Yisu ajuruba

Nisung balalai mapang balala nung yimya balala ajanga Yisu ajurur. Nisung kari bushia oa ajurur, nisung kar dangibo Yisu arur aser nisung karbo tangar ajanga ajurur. Aji oda, koba tia nung aser koba yimya nung ajurudir ajuruang, Yisu ajururtemji tia taka. Yisu ajuruba agi tasürtem shia arur, nükpokeri angur, tsüngtsükeri jajeteter, temenen tanüla agi pur kangshia alirtem salatsür aser shirangertem aneper. Yisu ajuruba agi temenen taidok angur aser teti atema Tsüngrem chir akümer. Aji oda, Yisui kümzüker ta asenok ajaki meteta lir. Ajisüaka, asenok dak tashimait kaji asenoki Yisu mebushir aser Yisui bushidanga asenoki Pa magizüker. Anungji ano, tangar ajanga Yisui asenok ya Pa dangi arudaktsüner saka asenoki iba taochi lenmangjia aiben mereprangteter. Aiben, tangar ajanga lenmang balala len nungi Yisui asenok ajar ser nung asenoki mangatetba ajanga Tsüngrem nungi taochi aser temoatsü magizükteti asenok temenen lar kümer shisaboluseta asenok alir. Tanü asenok den yangi kanga tesempatsü mapa inyaka senzüba temenen tsür kati tangar ajanga Yisu ajuruba otsü tejen ka lephsia lemsatepner. Laji Yohan tapu 8 nung shia aliba nüktapangtatsürla to lir. Anepdang yakta ka, Olive tenem nung tenla kidang Yisui nübotem dang sayutsüngia aliba mapang ka, Farisi aser Tezülurtemi nüktapangtatsürla ya nüktapangta benschia lia pur, laji Yisu dangi anir aru. Atangji, Farisi aser tezülurtemi nüktapangtatsürla Yisu dangi anir arubaji temenen taidok aser tekümtet agütsüdaktsünüa anir aruba masü. Parnok nükjidongjibo Yisu dak tai aputsü asoshi liasü. Ajisüaka, iba nüktapangtatsürla asoshibo Tsüngremer sentong balaka liasü. La nem taidok aser tekümtet agütsütsü asoshi Tsüngremi Farisi aser tezülurtem amshi. Iba anogo nung to la nüktapangtaya lia Farisi aser tezülurtemi mapu asünungbo, ano tang tashi Yisu majurui nüktapangta benschia senzüa lila ta kenkenbo temulung nung tipmedemi bilemer. La ya nüktapangtaya lia apu nungji, la den tebur ka dena liasü ta asenoki angateter. Ajisüaka, kechiba Farisi aser tezülurtemi kuli asütsü atema danga paji mapu aser kechiba tetsürla denji külemi Yisu dangi paji anir maru ta ano temulungjang nung tasüngdangba ka arur. Nüktapangta benschiba mapaji tebur atemabo tai masü saka tetsür atema dang tai asü ? ta asüngdangtsüsa adoker. Atangji, nüktapangtaba mapaji ajak atema tai saka iba anogo ya nüktapangtatsürla atema dang Yisui ajaba anogo ka asü südi. La pur Yisu dangi anir aodanga lai ola madok. Lai la medentsü memerang. Lai la temenen nempangtsü mebilem. Tanü tensa yimten mesüra lokti nung lenirtem kari tetsür ka tebur ka den nüktapangtaya ngur apu nungbo, ashiko tetsürla jagibo tebursangi tashiyim agi la raksatsütsü meranga liasü ta la temeden bushia nokdakla ta kenkenbo bilemer. Ibaji mesüka tangar ajanga Yisui kümzüksü ajar ser nung, asenoki asen tanurtem machimajemtsü chiajema lia tangari apudang asenoki parnok temeden indang jembir aser parnok apurtemjiang aitsür. Ibayongji, asenok tanurtem aser apuani aika Yisuiبو ajurunüseta ajar ser nung asenoki nokdangba agi Pa majurutet aser taochi mengutet samadagi. Nüktapangtsürla nüktapangtaya lia apuba ama, asenoka aiben asenoki tai inyaka lia tangari jakdaka apur, saka asenoki tai menanzüker aser memelenshir, anungji Yisu majurur. Asenoki asenoksasa shitak inyaker asü tai inyaker-ar meteta dang lir, saka asenoki memelenshiteter. Iba ama mapang ka nung ajungbena ka tangar ajanga aseni Yisu ajurutsüsa tai benschia lia apur. Iba ama mapang nung tangar dang mejashii Yisu ajurutsüba mapang tajung ta bilema, ajemajema Yisu tsüngdang oa nokdakra, nüktapangtala dang ashi ama, Yisui asen maitsütsü. Pa tsüngdang taidok aser taochi angutsü aser tekümtet ngur pelashishia alitsü.

OLEMSABANG

Tepela mulongjangji mozü tajung

~ L. Kika Pongener

Alima nung nisung ajaki teti pela-a linur, saka nisung ajakbo tetibo pela-a meliteter, kechiyong pela-a alitsübaji, odang pelanuba agi pelar masü, saka tensa mapangi bentsür arur. Nisung ka taküm nung pela-a alidang, ajongbena osang tamajung kar angashira, iba osangji angashili mepelai akümer. Nisung ka pela-a aliba mapang nung nisung kari pa/la dang o tamajung kar shira, mesura pa/la anema tamajung kar inyakra idangjisa mepelai akümer. Atangji, nisung ajaki mapang ajak nung pela-a dang linur, saka tensa mapang jagi mepelai alitsüsa bentsür arur. Ano nisung ka taküm nung tashitak tulu kar agi tonger manepteti yareta shiranga lira, pela-a linuyongjia mepelatetsüsa akümer. Aji oda, nisung ka taküm nung pela-a alitsübaji, temang shi (Physical body) nung timtem tekangshi kecha malitsüla, tekolok shisatsü anema alitsüla aser achi-ajemtsüa tanü poksungpo alitsüla. Apijemtsü shin o züluri ashiba..."Tepela mulongjangji mozü tajung lir" (A.Shin-17:22). Atangji, nisung ka taküm nung teti pela-a lira aji taküm asoshi mozü tajung lir. Teti pelaa aliba nisung kaji küm talangka arishia alitsü.

Asenok kija taküm ka teti pela-a linura, asen kechi aka, ibajagi tenuk sunga bilemstsüla. Asen kechi jenjang nung lir, ibajagi temulong sua bilemstsüla. Asen sorobangro kechi komaka sudir suang, aso-ajen kechi komaka sudir suang, ibajagi temulong sua tenuk sunga bilemstsüla. Asenoki asen takümüji asen dang nungi kanga agi temaba jenjang nung alir kar den medemdanga, asenok kodanga temulong sua pela-a malitsü. Anungji asenok pela-a linura, asen dang nungi kanga agi teküpokba jenjang nung alirtem den medemdanga bilemstsüla....Surabangla asenok teti pela-a alitsü. Asenoki asen dang nungi rongsenkettsüng nung temaba, takaba jenjang nung alirtem den medemdanga, asenok kodanga pela-a malitsü. Anungji asenoki asen dang nungi teküpokba, sensakba jenjang nung alirtem den medemdanga bilemdi....Surabangla, asenok pela-a alitsü. Asenok pela-a linura, asenoki tangar dak tajung dang reprangtetdi, tajung dang ajitetdi, tangar-ia asenok dak tajung dang reprangtetdagi aser tajung ajitet-dagi ta asen sasa bilemdi...Surabang asenok teti pela-a alitsü.

Asenok kibong telung nung pela-a linura, apuani tsüngda kati ka dak temulong lemteta alitsüla. Apuani tsüngda nung kati ka dang meimtepa alitsüla, kinungbui pa dang nungi kinungtsü taoba ta bilemstsüla aser kinungtsü-ia la dang nungi kinungbui taoba ta bilemstsüla. Kinungbu o kinungtsü na tsüngda kati ka angatetsüla aser kati ka akümtsübuttsüla. Kinungbu o kinungtsü na senpong ka dang asütsüla, aser kibong sentong külemi shisa lemsatepa yanglutsüla. Kinungbui kinungtsüi memeteti mapa kecha meinyaktsüla aser kinungtsü-ia kinungbu dang masüngdangi pei mulongka agi mapa kecha meinyaktsüla. Kinungbui pei kinungtsüji tetsür ajak dang tobur tajungtila ta bilemstsüla aser kinungtsü-ia pei kinungbui tebur ajak dang tobur tajungti-sang ta bilemstsüla. Apuani tsüngda nung temulong melemtepba (Suspicious minded) kecha malitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arise Summit tembangogo; mission wadang longjemer inyaktsü



Indonesia yimtiba, Jakarta nung Arise Leadership Summit 2025 tatembangbuba sentong nung tangokba noksa nung angur. Iba summit nung linük 22 nungi Khristan lenirtem aden.

August 02, 2025: July 31, 2025 nü Indonesia nung ayongzüka agiba Arise Leadership Summit tembangogo; anogo pezünü summit nung linük 22 nungi lenirtemi Asia tesem ajaklen mission lenirtem anitettsü atema longjemer inyaktsü bangjemogo.

Indonesia yimtiba, Jakarta nung ayongzüka sentong nung linük 22 nungi nisung 300 jungnüa shilem agia aden. Parnoki tarutsü nung mission wadang asadangba den külemi asalentong yanglu aser sarasadema among.

Tatembangbuba sentong nung Arise Asia tatong Tir, Rev. Seth Kim-i anogo pezünü tashi nung lemtepa arubatem metetdaksüba sülen Arise Asia Executive Director, Rev. Dr. David Ro-i anküp o jembia liasü.

Rev. Ro-i, iba summit tembangba ya wadang tatembang masü saka mapa tasen tenzüktsü atema mongpu tasen ka tenzüker, ta ashi.

Paisa lenirtem dang 2026 küm Thailand yimtiba, Bangkok nung ayongzüka Arise Asia 2026 Congress atema renema alitsü ayongzü.

Anogo pezünü tashi World Café sessions agiba aser o lemtepa arubatem nung ajemdaker Rev. Kim-i osang tejangja metetdakja liasü.

"Iba ya tatembangbuba o masü. Iba ya asenoki jembia arubatem mapa küma inyaktsü atema document ka lir. Nenoki shisa agütsüba aser Tanela Temeshi tetuyuba nung ajemdaker maneni iba document ya reprangshitsü," ta pai metetdaksü.

Rev. Seth Kim-i Arise Leadership Summit nung shilem agirtemi o lemtepa aruba nung ajemdaker tarutsü wadang atema omen pongu metetdaksü, aser itemji Mindset, Mentorship, Modeling, Missional Living aser Mobilization lir; koba dang "5 M" ta ajar.

Mezüngbuba omen

'Mindset' lir. Mission wadangji koma arangshitsüla aser shirnoki inyaktsüla?, ta shia Rom 12:2 nung ajemdaker Rev. Kim-i pei melungsentsü melenshitsü aser mission tangatetba tasen nung ajemoka inyaktsü ayongzü.

Paisa, Arogo nung züngsemtem nem Laishiba nung ajemdaker mission t a m e n d a k d a k angatetdaksütsü aser Khrista osang tajung proktsü atema mission nung shilem agirtem dak theological shisaliok alitsüla, ta ashi.

Iba onük nung o lemtepa mapang nung Summit nung shilem agir kati, "Asen melungsentsü nungi tenzüktsüla. Ajisüaka asenoki chichiba melenshitettsü asü? Tsüngremi dang asen m e l u n g s e n t s ü melenshitsütettsü. Anungji asenoki Pa den partner ser inyaktsüla," ta ashi.

Tanabuba omenji 'mentorship' lir. Iba omen nung o lemtepa mapang nung shilem agirtemi tanur-tain tsüngda ongdang malitsü atema tesendaktep yanglutsü aser lenirtem adokdaksütsü atema tanur-tain telemsa makai nütsüngsütsüla ta bangjema liasü.

Iba dak sendakba nung Rev. Kim-i taintem dang lanur lenirtem dang maneni len sayua anitettsü ajungshi. Kim-isa lenirtem dang lokti nung sayuba dang masü saka tarutsü nung lenir akümtsüburtem nem nija tesayuba agütsütsüla aser parnok den o lemteptsüla, ta ashi.

Tasembuba omenji 'modeling' lir. Iba ya taintemi tarutsü lanurtem dang ochi, ajemalu aser Tsüngrem tenzükba dak sendakba nung tatishitsü tajung sayutsü atema lir.

1 Korint 11:1 nung, "Ni Khristai sayuba benshiba ama ni benshibatem benshiang" ta shia aliba nung ajemdaker Rev. Kim-i lenirtem dang tatishitsü tajung sayurtem lenir kaka

asütsü ayongzü.

Pezübuba omenji 'missional living' lir. Iba ya Khristantemi anogo shia Kibubai tenyaba wadang tulutiba inyaktsü atema lir.

Mathi 28:19-20 nung ajemdaker Rev. Kim-i "kintem ajak nütsüng kümdaksütsüla", aser iba atemaji Arogotem, schools, mapa inyakba tesemtem aser online platforms ajanga inyaktsü nüngdak, ta ashi.

Iba dak sendakba nung pai akhidang nungi inyaka aruba ministry mapa kasa inyakba denji külemi digital densema tanga maongka balala bushia Khrista osangtajung proktsüla, ta ayongzü.

"Tanu putu nung TikTok aser tanga social media sabang balala ajanga Khrista osangtajung kanga junga prokteter. Item lenla nung lanurtem ya metsü aser tesangwa kaka kümdaksütsü atema asenoki inyaktsüla," ta Rev. Kim-i metetdaksü.

Omen pongububaji mobilization lir, aser ibaji summit mapang jembia arubatem mapa küma inyaktsü asoshi lir. Rev. Kim-i pa college azüngba mapang nung Africa-i mission trip aoba lemsatepa liasü.

"Onoki kecha balaka meinyaktet, saka ibaji ajanga ni akasodaksü, aser tanü tashi ibaji ajanga ni ajungshir," ta pai ashi.

Paisa Arise movement nung shilem agiba linük ajak dang taruba küm local team kaka aser international team kakabosa mission trip yoktsü ayongzü.

"Alu jenti menzüka lir, ajisüaka mapa inyakterem ishika dang" (Mathi 9) Lai O nung ajemdaker Kim-i, "Asenoki saradaemtsüla, renemtsütsüla aser yoktsüla," ta ayongzü.

Sangküm Thailand nung Arise Asia 2026 Congress agitsü aliba dak sendakba nung Rev. Ro aser Rev. Kim nati, tarutsü putu lanurtem anitetba lenmang nung Bangkok nung ayongzüka summit ji alizüng ka atongba amai asütsü, ta ashi.

ANOGO ABEN TSÜNGREM DEN

PAI MOATSÜBA YARI PA NEM AGÜJANG

Kibuba ne Tsüngremi na moatsüba yari, Pa nem nai mokoroi ne san telok nungi, motsüngnem aser tsükmenatsü menüngdak nungi Pa nem agütsütsüla. ~ T.Kunem 15:14

Iba Lai o ya Israel nungertem dang temoatsütem ya Tsüngrem nungi, anungji Pai koma moatsür ibaji arem nung san telok rem lanu, tzü aser chiyongtsü balala moatsüba agi dang santem arener ibaji asadanga Pa dang tenlatsüla. Motsüngnem, tsük rur nangtena ayudak nungi Pa nem tenla agütsütsüla, tetezü ano tesem balalai belenshia maodang Tsük ajak külemi nangtena alidang iba nungi Tsüngrem temoatsü temulung chia asadanga mokoroi tenlatsüji Pa temelaba ozüng ama Tsüngremi ashiba angur.

Tanü aki ama san telok mesüra alu ayimba bulua mali saka Tsüngremi lenmang balala tatishitsü agi, ita sen anguba, business inyakba ano aika. Tanga nüngdak atema asen nem moatsüba belenshia maodang tamasa Tsüngremi moatsüba asadanga aser züngdanga Pa nem tama tenla agüja temoatsüsang bilemtettsü tanü asenok nem angatetdaksür ta Tsüngrem o nungi bushiteter. Anungji Tsüngrem o kanga aroka shisadanga Pa o-i kechi ashir item ya kanga nentaka shisadanga shitak inyaktetra Pa temoatsü agi mesempetiang malitsi. "Tsüngrem tama südaktsüba nung temoatsütem renloker "

Violent Incidents Database (VID) atema ICC-i IIRF den longjemer

August 02, 2025: Violent atema pelar, aser iba ya ajanga Incidents Database (VID) alima tesem ajungalen renemba nung yariteptsü atema reshikangshi ajangshiba International Christian Concern Khristantem atema onoki (ICC)-i International Institute inyakba wadang tali tashi for Religious Freedom (IIRF) itshitsü," ta metetdaksü.

den longjemogo, ta International Iba database (VID) ajanga Christian Concern (ICC)-i continent pongu nung tamangba metetdaksü. yimsü temeden anema inyakba tatalokba osangtem bendener. VID-i item osangji talisa public dang nungi angur, ajisüaka aikati Khristantem anema inyakba osangtemji melemsateper mesüra item ama osang aika temai madoker.

VID ya alima tesem balala nung tamangba yimsü temeden anema inyakba aser Khristantem reshikangshiba osangtem bendena asadangba data lir.

Tesüiba küm pezü tsüngda iba database ajanga alima tesem balala nung tamangba yimsü nung ajemdaker reshikangshiba tatalokba 600,000 dak tali bendenogo.

ICC Advocacy Manager, McKenna Wendt-i, "ICC indang advocacy mapa inyaktsü atema onoki data shidak nüngdaker. Kuli agütsür ama item osang tejangja nungji ajemdaker onok sorkartem aser yimtenren lenirtem nem temepishiba agütsütetter. Iba project nung onoki (ICC) IIRF den partnership yanglutetba

atema pelar, aser iba ya ajanga alima tesem ajungalen reshikangshi ajangshiba Khristantem atema onoki inyakba wadang tali tashi itshitsü," ta metetdaksü.

Iba database (VID) ajanga continent pongu nung tamangba yimsü temeden anema inyakba tatalokba osangtem bendener. VID-i item osangji talisa public dang nungi angur, ajisüaka aikati Khristantem anema inyakba osangtemji melemsateper mesüra item ama osang aika temai madoker.

"IIRF den partnership yangluba ajanga ICC-i alima nung Khristantem reshikangshiba aser Khristantem reshikangshi kanga bulua akümba osangtem jungkai adoktsütsü atema VID amshitsü. Item data ji onok indang projects nung inoksemba ajanga onoki yimtenren lenirtem den o lemtepa tsütsü teyari tulu asütsü. Khrista nung asen aianu aser adianutemi ajangshiba timtem nokdangtsü atema onoki rongdak süa inyaktsü," ta Wendt-i metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tesangtem**

(adj) apetasong maket, tazüing nungi talak tashi teraksa melii intetba (grown well)

* Yim among anasa süngdong tesangtem tulu wazüka ayur.

Tesangwa

(n) amang masü, anü adoka aliba mapang (light)

* Asenok asoshi anüi tesangwa agütsür.



Tir Yimyim

OLONG PAITEP # 7226

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teburtemi tejak nung awaba
6. T _ _ _ em
8. Tzüik ayudak
9. Nüingdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den külemi yanglusemer

-

(8)

-

(3)

-

(3)

-

(6)

-

(4)

-

(5)

-

(3)

-

(3)

-

(8)

LANGTSÜNGLEN

1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüingda
13. Tangar inyakba ka inyak
14. Tim masü ta ashi
15. Asalendong
16. Tanü dangtsü

-

(6)

-

(4)

-

(6)

-

(5)

-

(4)

-

(6)

-

(6)

-

(5)

-

(4)

-

(4)

OLONG PAITEP # 7227 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. Teronem, 12. Sempa,
13. Jahaz.

**NAGA NUNGER YIMYA KAR :**

Alokba : Naga nunger yimya kar shidi

1. Anepdang walk aodang gari nung aoba yimya.
2. Department nungbo sen mejepzüka agimar, külen Arogo nungbo deacon inyakba yimya.
3. Tasür kidang noksa agidang tasü mang dang ready ! ta ashiba yimya.
4. Gari nung aodang pei khu pei-i dang apenba yimya.
5. Tsüngrem tenzükeri ola madoki dang envelope agizükatokba yimya.
6. Tangar ka ludaktsünü dang tsükchir ana temba ayimba yimya.
7. Arogo nung tenzüknüba agi teshimer anodang kipoksema aoba yimya.
8. Sen jenti agi aliba telongsü süaka tema nung sayunüba yimya, item rongnung karbo temelenshitsü lir mali?

Naga nunger: O Alokba !!!!

Lilir : I. Kilang Ajem, Indisen, Dimapur.

Assam CM Sarma-i Kamrup court complex semzüksü

Assam CM Sarma-i Kamrup court complex semzüksübo noksa nung angur.

Guwahati, Luroi/August 2 (TYO): Assam Chief Minister Himanta Biswa Sarma-i Hokolbarnü Guwahati kübok Amingaon nung Kamrup District Judicial Court Complex tasenba semzüksüo.

Iba ki ya sen corre 52.25 intoka yanglu, koba Kamrup district aser iba temeket nung alirtem nem temzüing ozüing dak sendakba nung ochi obendang agütsütsü nükjiong nung yangluogo.

Chief Minister indang official X account nung post ka ajanga ashiba agi, Kamrup District Judicial Court Complex

ya modern, integrated judicial infrastructure ka agütsütsü atema design süa yangluogo, kong courtroom 15 aser obendangba inyakyim sayutsü atema advanced digital services keta lir.

Facility tem rongnung e-filing, video conferencing, aser case tracking amala digital service tem densema lir, koba ken o tem takaratiba nung obendangtsü, paperwork tajemba kümdaktsütsü aser ochishia inyaksü atema design süa yangluogo.

Courtroom tem den bendenloksema iba complex

nung obendangertem takdang, nüburtem ata-a kazüba takdang aser lawyers' lounge tem densema lir.

Court semzüksüba sentong nung CM Sarma-i, state ajunga nung justice infrastructure tajungba küma yanglushitsü atema sorkar bendanga agütsür aliba lemsatapa liasü.

Paisa, judicial service tem decentralize asütsü aser mapang shidak nung obendang agütsütsü atema tanü asüing amshiba hadirtem tapet agütsütsü koda tongtibang iba indang lemsatap.

Orphanage ka hotel kümtsüba atema Gogoi-i Assam sorkar aitsü

Guwahati, Luroi/August 2 (Agencies): Congress MP Gaurav Gogoi-i Dima Hasao nung yimjak nung senotsü agüja yangluba orphanage ka luxury hotel ka kümtsüba atema sorkar aitsüba sülen Assam nung yimden yimsüsüba tsütsü mepetmesü adokogo.

Gogoi-i Honibarnü social media ajanga iba osang lemsatapa sülen state indang terenlok maparen atema policy tem aser public fund amshiyim dak sendakba nung mepetmesü adokogo.

Gogoi-i X ajanga ashiba agi, "26-07-2021, nü Chief Minister Himanta Biswa Sarma Boro Haflong, Dima Hasao nung NLCPR Fund nungi sen crore 2.98 intoka yangluba orphanage ka lapokja liasü. Iba sülen ita ishika tsüingda

tanurtem ya iba tesem nungi anin. 2022 küm iba ki ya shilem kar raksar yanglushi. Tang 26-07-2025 küm kasa ki ya Hading Hotel ama lapokshiogo. Assam tasenba nung nüburtem atema terenlok maparenji ya asü? orphanage nungi luxury hotel, koba nüburtem indang sen agi yangluba lir."

Iba ki ya Non-Lapsable Central Pool of Resources (NLCPR) scheme kübok yanglu, koba Northeast nung infrastructure jenjang ajungkettsü atema benokba lir.

Iba orphanage ya shitakbabo teyari nüingdaka aliba tanurtem nem ki agütsütsü atema liasü aser 2021 küm Chief Minister Sarma-i iba ki semzüksüba ya tanurtem tajangzük asoshi alizüing tasen ka tongtetba ama züingshia

liasü.

Ajisüaka tanurtem ya yakta dang iba tesem nungi anin aser tanga mapa ka asoshi amshi tenzüko.

Source balala ajanga ashiba agi, private sector tem densema iba ki ya 2022 küm kanga junga yanglushi aser "Hading Hotel"-i melentsüo.

Congress densema opposition party temi, orphanage yanglutsü atema senotsü amshiba audit agitsü aser iba ki tanga mapa ka atema amshiba ya bushisüingdangtsü khang arudar.

Activists aser child welfare organization temi iba ya tashioktsüba ka ta shia arudar.

Iba taitsüba dak sendakba nung Assam sorkari tang tashi kecha telangzüba agüja mali.

Meghalaya sorkari nagmati 4,000 MT samaba bushisüingdangtsü tuyu

Shillong, Luroi/August 2 (Agencies): Meghalaya sorkari nagmati metric tonnes (MT) 4,000 dak tema nagmati bendena ayuba tesem nungi sama ta ashiba osang ya bushisüingdangtsü atema tetuyuba agütsüo, ta Deputy Chief Minister Prestone Tynsong-i Honibarnü ashi.

Tynsong, shibai Home portfolio bona lir, pai ashiba agi, iba ken o kanga junga bushisüingdangtsü atema district ketdangsurtem aser police nem tetuyuba agütsüo.

"Onoki deputy commissioner aser superintendent of police tem dang inyakyim meshidakba mesüra nagmati ya ozüing alema

belenshi asüba masü, aji jangjatsü atema bushisüingdangtsü tetuyuba agütsüo," ta pai osangbenertem dang ashi.

Okadaki shimba committee kati Meghalaya High Court nem osang agütsüba sülen iba telemtetba ya agia liasü. Iba committee yagi taoba mapang list süo ta sangdonger aliba nagmati MT 4,000 dak tema nagmati bendena ayuba tesema ana nungi samar aliba metetdakja liasü. Committee-i bushisüingdangba sülen ngutetba balala ajanga ozüing alema nagmati belenshiba nokdaktsü atema sorkar inyakyim ashishia tenzüko.

Tynsong-i ashiba agi, aibelen kar danga aliba ngutetra temzüing ozüing dak ajemdaker jenjang tapet agitsü atema sorkar bendanga agütsür lir. "Aibeklen kar danga lira onoki temzüing ozüing dak ajemdaker jenjang agitsü. Supreme Court dangi ken o abentsü asüyonga onoki inyaksü," ta pai ashi.

Ketdangsurtemi ashiba agi, bushisüingdangba mapang diesel aser coal inventories naprongla asadangtsü, parnok belenshiperaba, kuli kakat tem asadangtsü aser tesem tonga oa bushisüingdangtsü. Mapang tatong nung osang tejengja bendener High Court nem agütsütsü.

Onok ket nung nuclear submarine peria lir: Russia



Moscow, Luroi/August 02 (Agencies): US Tir Donald Trump-i US nuclear submarine tem 'appropriate regions' nung yoktsü ta ashiba nung Russia-i telangzüba agüja, America nunger submarine ana azüoktsü asoshi tzüyim nung Russian nuclear sumbarines peria lir, ta Russian Parliament Duma züngsem kati ashi.

"Alima tzüyim nung Russian nuclear sumbarines aliba ya America nunger indang dang nungi kanga agi timba, aser US Tir Donald Trump-i tapet region leni yoktsü totuyuba agütsüba subs ya mapang talangka nungi onoki amokbanga lir. Anungji American leniri submarines indang sangdong agütsüba nung Russian Federation nungi telangzüba agütsütsü menügdaker," ta Russia nunger ozüng yanglur Viktor Vodolatsky-i ashi.

Hokulbarnü Trump-i pa indang Truth Social nung "appropriate regions" leni US submarines tanaben yoktsü totuyuba agütsüogo ta shia liasü, aser ibai Russia indang taoba tir aser Russian Security Council nung deputy chairman Dmitry Medvedev-i rara mesüa sangdong agütsüba ajanga lir ta ashir.

"US subs ana ya tzüyim nung jajadakjang, item ya mapang talangka nungi crosshairs nung lir. Russia aser America tsüngta fundamental agreement ka renemtsüla, kechiaser yamaji inyakba ajanga dang alima süngjemsü aser World War III tenzüksü indang jembiba anentsü," ta pai ashi.

Anogo ka tejakdang Medvedev-i nüngtugu 'Dead Hand' ya koteka lendong lir ta Trump-i shisadangtsü

nüngdaker, ta Russia indang Cold War mapang yangluba nuclear weapons system athishia ashi.

"Item tamachi aser mangatettep adoktsü sangdongba ya shidakba asünungbo ta sür Nuclear Submarines ana tapet tesem nung renema atatsü ni totuyuba agütsüogo," ta Trump-i zülua liasü.

"O ya kanga tongtipang aser mekumdangi jembiba ajanga aiben mebilemi aliba timtema ajurur, aser yamajibo masütsü imlar."

Medvedev aser Putin tesendaktep tajung lir. Medvedev ta 2008 nungi 2012 tashi Russia tir inyakdang Putin ya pa indang ato kilonser liasü. Iba sülen Putin tir akumba sülen Medvedev ta 2012 nungi 2020 tashi pa indang ato kilonser inyaka liasü.

Saka Russia-i tang Ukraine amakba nung Trump tali tezü tanga ola adokdang Medvedev tenüng tali tuteta jembir, shibai raratsü kanga janrar. Tenaprongi pei linük nuclear tashi indang jembir aser yimjak nung o tamajung shitepba tali tesashiba kumogo.

Hopta tetenzüklen social media post ka nung Trump-i India aser Russia tsüngta shishilempaba indang jembidang Medvedev tenüng tetshia liasü.

"India-i Russia den kechi asür ni bilema mali. Parnoki parnok indang 'dead economies' külemi tamajungba kumdaktsütsü akok," ta Trump-i zülua liasü.

"Russia aser USA külemi business kecha meinyaker. Yamaji dang liti, aser Medvedev, taoba mapang tamakok anguba Russia tir

Medvedev, shibai tang tashi pa tir ama bilemer, pa dang o kumdanga jembiang ta shiang. Pa lendong tulu aketba territory kati aiter!" ta Trump-i social media nung zülua liasü.

Iba sülen Medvedev-ia, "Russia indang taoba tir kati jembiba nung United States indang 'high-and-mighty president' kati yamai tsüboseta langzüra, Russia-i ajak shidak inyaker aser pei lenmang nung maneni jajatsü," ta Telegram nung shia liasü.

Ukraine nung yimjung alitsü asoshi jembishinüba nung terenlok maliba nung Trump tali tezü tanga akumer.

Trump kümsük tanabuba tir akumdang alima nung yimjung yanglur aser lungjemdaksür ka asütsü nangzüka liasü aser par administration-ia yimjak nung pai Nobel Peace Prize angutsü langa lir ta jembir.

Ajisüaka pai Ukraine aser Russia tsüngta mangatettep bentettsü merangba nung anendaka lir. Trump kümsük tanabuba tenzükdang Ukraine Tir Volodymyr Zelenskyy dang "dictator" aja aser Russia nem pari rakzüka aliba Ukraine litsütem densema agütsüner ama ajitetba yong pa aija liasü.

Ajisüaka tangbo Trump-i Russia nem temerenshi agütsütsü amokmerener. July 28 nü Russia-i rara anentsü anogo 10 mesüra 12 dang lir, aji mesüra rongsenketzüng tsütsü temerenshi alitsü, ta pai sangdonga liasü.

Iba sülen Brehostibarnü Russia-i Ukraine yimtiba Kyiv amak aser Trump-i aitsü.

"Russia - parnoki kechi inyaker, ya tesempatsü mapa lir. Ibai tesempatsü amai ni bilemer," ta pai shia liasü.

Gaza nung Israel-i injang khalok-tsüba nung nisung 18 tepset

Deir al-Balah, Luroi/August 02 (Agencies): Honibarnü Israel-i injang khaloktsüba nung nisung ter dak tema tepset aser yangji chiyongtsü bushir nisung ti lir, ta Gaza nung aliba mozüki tem osang ajanga ashir.

Gaza Humanitarian Foundation distribution site ka anasa Honibarnep atalokba indang Yahia Youssef-i rasaa ashi. Injang agi yirua aliba nisung asem yaritepa bener aoba sülen pai temeket nung reprang aser dangartem azü agi yimbanger ali nung laoa aliba angu ta ashi.

"Kasa ya anogoshi ataloker," ta Youssef-i ashi.

Ajisüaka Israel-i yariba American contractor indang GHF-ibo parnok anasa kecha matalok ta ashir.

US ketdangsür temi GHF-i lapoka aliba chiyongtsü aser teyari oset alemba tesem ka semdanga US Ambassador to Israel Mike Huckabee-ia item teyari oset lema agütsüba ya takok tulu lir ta shir anogo ka lir iba azüdokshi ya ataloker. Yasa-tzüra agi sünger aliba Gaza nung GHF-i teyari agütsütsü merangba nung linük balalai mepelar, kong azüdokshi aser mepetmesü agi sünga lir.

"Onok parnok (sepaitem) anasa meliasü aser yangji lendong timtem kecha meliasü. Ni tasüba nungi sayatenya agi jenbuogo," ta arishi küm 30 shi tain Abed Salah-i Netzarim corridor anasa GHF site ka nungi ashi.

Israel-i Hamas anema ita 22 jungnüa amakba ajanga Palestine nunger million ana aliba territory nung security ajasatsüogo aser yaseta aliba

nüburtem nem chiyongtsü magütsüteter.

Tesüiba ghonda 24 tsüngta Gaza Strip nung achi-ajemtsü peria maliba dak sendakba nung Palestine nunger nisung tenet süogo, ta iba territory indang health ministry ajanga Honibarnü ashi.

Item rongnung tanur ka dena lir, anungji Gaza nung rara tenzüker chiyongtsü peria maliba yong asüba tanur 93 ajunger. June ita tatemlen nungi achi-ajemtsü peria maliba yong nisung tain asüba züngdang tenzüker tang tashinung Gaza nung nisung tain yasa-tzüra agi asüba 76 lir ta ministry ajanga ashir.

May 27 nungi July 31 tsüngta GHF sites anasa nisung 859 tepsetogo. Iba den chiyongtsü belenba lenmang nunga nisung noklang aika tepsetba osang lir.

GHF-i par armed contractors temi nisung tali madenshidaktsütsü atema pepper spray ang amshir mesüra tekumdangtsü injang ang khaloktsür ta ashir.

Health ketdangsür temi ashiba agi, Honibarnü Israel-i tayimtsü amshia amakba aser injang khaloktsüba nung Palestine nunger 18 tepset aser item rongnung nisung asem distribution site ka nungi anir aoba dena lir.

Honibarnü asürtem rongnung nisung ter bo central aser southern Gaza nung amakdang asüba lir ta ketdangsür temi ashir.

Teyari agütsüba tesem anasa amakba mesüra asüba indang asüngdangba nung Israel mitkari telangzüba agüja mali.

Social media post mechi taoba Mali PM anema ken o benokogo

Bamako, Luroi/August 02 (Agencies): Taoba Mali ato kilonser kati political prisoners semdangba indang social media nung lemsatepba sülen linük dak tamang kaa aliba nung tetsükdaktsü agütsür ta ken o benokogo, ta prosecutor kati ashi. Mali nung Moussa Mara ya 2014 aser 2015 tsüngta ita ti ato kilonser inyaka liasü. Pai July 4 nü social media X nung tepuokdak alirtem semdanga parnok nem ochi obendang agütsütsü nangzüka mechi taoba mapanga asüngdangyatsü jaoka liasü.

"Ammang komaka talang liaka, anü adoktsüsa! Ibai tekeraba nung ataloktsü asoshi akok tashi yimya ajak amshia asenoki raratsü!" ta pai zülua liasü.

Mara ya tepuokdak lir aser ken o ya September 29 nü jembitsü. Par okatsür temi Hokulbarnü sangdong ka nung iba ken o benokba aitsü.

Küm pezü jungnüa jakdang sepaitemi yimten tashi rakzüker linük nung democracy bhukuma rally mezüngbuba aliba sülen

Mali mitkar yimsüsür temi parnok anemertem pua merenshiba nung Mara apuba ya tang tesüsa atalokba lir.

Yimten-yimsüsüba nung tamang akaba mechi tepuokdak alir dang temeim sayuba atema cybercrime prosecutor kati aputsü tuyuba sülen Mara ya apu, ta pa den kanga junga metettepa alir Abdoulaye Yaro-i osangbener dang ashi.

Taoba ato kilonseri state tashi nung tetsükdaktsü agütsü, nüburtem mepetmesü adoktsü ajungmeso aser osangtsüsang tiazü prokshi ta tai tonglokja ken o benoka lir, ta pa indang okatsür Mountaga Tall-i X nung ashi.

General Assimi Goïta-i anir 2020 aser 2021 nung anaben mitkar tashi amshia sorkar atsüngdokba sülen tang pa Mali yimten tekolakba lir. Mitkar indang sorkari March 2024 tashinung civilian nem yimsü südaktsütsü nangzüka liaka June ita pai ano küm pongu yimsü asütsü temelaba agütsü.

May ita mitkar temi political party tem anentsüba sülen iba mera ya agia liasü.



Hokulbarnü Punjab province nung Sheikhpura district kübok Kala Shah Kaku anasa Islamabad Express train ka lenmang tezüleni aoba lendong nung passenger 29 yirua ketdangsür temi rescue operation tesashi ka tenzük.

Dr. T. Ao Trophy: Mokokchung-i goal 3-1 agi Wokha kokogo



Dimapur, Luroi/August 2 (TYO): Dr. T. Ao Trophy 2025 tenzüker tanabuba anogo Group C nung Mokokchung aser Wokha na asaya Mokokchung-i goal 3-1 agi kokogo. Indira Gandhi Stadium Kohima nung tanü iba asaya ya tzünglu tuluka arua asaya aser iba sülen ano tzüsi agi longbanger asaya liasü.

Asaya mezügbuba shilem nung team anapronglai goal idaktsüsi atema kanga meranga asaya saka magütsüteri tembang. Wokha team-i kanga tashi ita asaya aser asaya amokbanga liasü aser parnoki goal idakja asaya akoktsü imla liasü.

Ajisüaka asaya tanabuba shilem nung Mokokchung team-i tajungba asayateta parnoki mezügbuba goal idaktsü. Aisüaka mapang tatsüka dang lir Wokha team-ia goal ka idakja goal kasasa aküm.

Telok ana tsüngda kanga toktepbba asayaba sülen

Mokokchung team-i ano goal ana idaktsü aser goal 3-1 agi asaya koka liasü.

24th Dr. T. Ao Inter-District Football Tournament ya Hokolbar aonung kanga meraketa tenzüko. Taküm iba asayamung ya Football Association (NFA) aser Youth Resources & Sports Department tawabangba kübok Kohima District Planning & Development Board (DPDB)-i host süa Indira Gandhi Stadium nung asayadar.

Asayamung lapokba sentong nung o jembiba mapang Nagaland Chief Minister Neiphiu Rio-i, state nung saisabong terenlok atema state sorkar bendanga agütsür aliba nenshia metetdaksüba mapang, state nung football aser tanga asaya ajungkettsü atema jenjang balala agia aliba indang metetdaksü.

Rio-i ashiba agi, district ajak nung Astroturf football ground tem yangludat aser Dimapur,

Phek, Mon, Mokokchung, Tuensang, aser Chümoukedima nungbo yangluzükogo.

Paisa, state kübok tesem balala nung futsal courts 28 aser multipurpose sports buildings 31 tang teyangludak lir, aser ano state indang sports infrastructure programme kübok tanga project tem atema sentong yangludat, ta ashi.

Saisabong ya sütoksünemtsü atema dang masü saka USD billion 600 alang global industry ka ta shia pai, iba renloka oya aliba sector nung Nagaland-a shilem agitsü atema jenjang agidar, ta ashi.

Chief Minister indang Sports Scholarship kübok football asayar 16 aser coach tem tang training agidar aser bowler ana bendanglen oa training agidar.

Naga nung rongnungi nüngtugu football asaya Dr. Talimeren Ao, shiba Olympics nung mezügbuba India team captain liasü pa nem tetushi agüja jembiba mapang Rio-i, inter-district asayamung ya telongjem temaitsü ka aser iba ajanga Naga nung er ajak ajungmesotsü, ta ashi.

Chief Minister-isa, Junior Girls National Football Championship ya Dr. T. Ao National Women's Junior Football Championship ta nungja melentsüba atema All India Football Federation (AIFF) dang kanga pelaba lemsatsep. Iba asayamung ya taküm küm tatemlen Nagaland nung asayatsü.

Newcastle-i Ramsdale loan nung anir aruogo

Luroi/August 2, 2025 (TYO): Newcastle United-i taoba mapang Arsenal goalkeeper Aaron Ramsdale, season ka atema Southampton nungi laon nung anir aruogo, ta Premier League club yagi Honibarnü metetdaksü.

Arishi küm 27 tain England nung er goalkeeper, shiba taoba season league nung goal timtiba kümzüka (125) keeper rongnung tanabuba jenjang nung liasü pa taoba mapang Bournemouth nung Newcastle manager Eddie Howe den külemi inyakogo.

Newcastle United nung adenba indang jembiba mapang Ramsdale-i ashiba agi, "idaki aruba ya jangrademtsüka lir. Ni idaki arua asayanüa dang aruogo aser fan temi koda bendanga agüja team pusemer aji ni meteta lir."

"Manager aser pa indang coaching staff tem den inyaktsü maongka anguba ajanga ni kanga atsüa arua liasü. Kü indang career nung parnoki kanga teyari agütsüogo aser coach-i ni Bournemouth nung nisung ka aliba nungi professional footballer

ka küm daksü," ta paisa ashi.

Kasa mapang nung head coach Eddie Howe-i ashiba agi, "Aaron ya goalkeeper tajung ka lir aser pai international jenjang nung asayaba tajangshiba tajung bener arua team nem teyari agütsüsi."

"Pa den taoba mapang inyaker asünung ni pai ground telung aser tema nung kechi inyaktetsü aji jangja lir, anungji pa agizütsü yongya atar," ta paisa ashi.

Newcastle pur taoba season Premier League nung pongububa nung tembang aser parnok Champions League atema qualify süogo. Parnok taruba season mezügbuba asaya Aston Villa den August 16 nü asayatsü.

Ramsdale ya taoba küm Arsenal nungi Southampton nung aden aser 2028 küm June ita tashi tenangzüktepba yanglur lir.

Pa 2021 küm Sheffield United nungi Arsenal nung aden aser season ana tashi first choice keeper ama asaya aser iba mapang 2022-23 Premier League nung parnok tanabuba jenjang nung tembanga liasü. Ajisüaka taruba küm pa ya David Raya-i melena liasü.

Sen aser Mannepalli na semifinals nung tsükogo



Lakshya Sen & Tharun Mannepalli

Luroi/August 2, 2025 (Agencies): Macau Open Super 300 badminton asayamung nung Honibarnü tebur kija asaya semifinal nung Lakshya Sen aser Tharun Mannepalli naprongla tsükba sülen India nung er asayar ajak tsükogo.

Honibarnü mezügbuba semifinal asaya nung Lakshya ya Indonesia nung er asayar Alwi Farhan-i straight games nung koka liasü. Arishi küm 23 tain India nung er asayar shiba tang world rankings nung jenjang 17buba nung lir, pai iba asaya 16-21, 9-21 agi makok. Sen yiruba ajanga aser form nung maliba ajanga taküm junga masayateti arudar aser iba asayamung nunga tatembang mtongteti tsükogo.

Tanga semifinal asaya ka nung Tharun Mannepalli-i kanga meranga asaya saka pai Malaysia nung er asayar Justin Hoh mekokteti liasü. Arishi küm 23 tain India nung er asayar ya tang jenjang 47buba nung lir aser pai semifinal asaya ghonda ka ser minute 21 kanga meranga asayar 21-19, 16-21, 16-21 agi mekoki liasü.

Paris nung World Championships masaya tsüngda form yanglushitsü nükjiding

nung Sen iba asayamung nung asaya liasü, saka Farhan-i asaya tetenzük nungi amokbanger asaya liasü.

Mezügbuba game nung Sen 3-0 agi tejakdang sür tenzüka mapang tatsüka dang lir Farhan-i asaya amokbanger asaya tenzüka 11-7 agi pa tejakdang aküm aser mapang tatsüka dang lir asaya koka liasü.


Tanabuba asaya nungbo Farhan-i Sen nem point 9 dang yangludaktsür asaya koka liasü.

Tharun aser Justin na asaya mezügbuba game nung Tharun-i asaya kanga junga tenzüka 11-6 agi pa tejakdang aküm aser iba sülen Hoh nem memenedaktsüi asaya koka liasü.

Ajisüaka tanabuba asaya nung Malaysia nung er asayar yagi asendenshir kanga junga asaya aser 21-16 agi asaya akokba sülen decider asayatsüsa aküm.

Tasembuba game nung Tharun-i maneni asaya kanga tashi ita tenzüker aser pa 6-3 agi tejakdang aküm, ajisüaka mapang tatsüka dang lir Justin-i pa ajateta tua point 13-16 aküm. Iba sülen Justin-i Tharun nem point asem dang ngudaktsü aser asaya koka liasü.

Küm 10 sülen Son-i Tottenham toktsütsü



Son Heung-min

Luroi/August 2, 2025 (Agencies): Tottenham captain Son Heung-min-i ashiba agi, küm 10 sülen pai taküm lemluwa club toktsütsü.

South Korea nung er international asayar ya 2015 küm Bayer Leverkusen nungi Tottenham nung aden aser pai asaya 454 nung goal 173 idakja liasü.

Taküm May ita Europa League final nung Tottenham-i Manchester United akokba asaya nung pa captain liasü, koba club-i küm 17 nung mezügbuba takok marok akokba liasü.

Arishi küm 33 tain asayar shiba Spurs nungi 2026 küm tashi asayatsü atema tenangzüktepba yanglur lir, pa Major League Soccer club Los Angeles FC-i aotsü atema jembishinüdar.

Son-i ashiba agi, iba telemtetba agiba ya pa indang career nung telemtetba agiba rongnung ajak dang tasaktiba liasü.

"Ni tanur asüding north London-i aru, ni asangur chanu ka dang liasü shiba English dena mejembiteti liasü," ta Son-i ashi.

"Ni tebur tientet ka ama iba

club toktsüba atema kanga nemadanga bilemer," ta paisa ashi.

Tottenham pur taruba season atema renemshiba mapang tang Seoul nung oa lir, aser Deobarnü Newcastle den asayaba mapang Son lenisüba nung par team asayatsü aser iba tetezü pa club nungi tatemsa asayaba ya par linük nung asayatsü akok.

Frank shiba June ita Ange Postecoglou ket nungi head coach mapa agizükogo, pai ashiba agi, Son ya Spurs indang legend ka aser Premier League nung asayaba asayartem rongnung ajak dang tajungtiba ka lir.

"Son atema taruba asaya ya club nungi tatembangbuba asayaba süra kidang fan tem matsüngdang asayatsü koda jangrademtsü asütsü," ta Frank-i ashi.

Tottenham pur ano August 13 nü Paris St-Germain den Uefa Super Cup asayatsü, ajisüaka iba mapang tashi nungbo Son-i club toktsür alitsü akok.

BILEMDANGANG

"Tashiba ya khen atema dang, saka tesasabo teti atema lir."